



Papel F-FDTL no PNTL ho Lisaun sira Husi Krize Saúde Pública (Covid-19) ba Seguransa Nasional

Mahein Nia Lian Nú. 147, 26 Agustu 2020



Foto: Sentru media-COVID-19

Fundasaun Mahein (FM)
Website: www.fundasaunmahein.org
2020



Kontiudu sira

Kontiudu sira	2
Introdusaun	3
Metodolojia	3
Sistema Integradu Seguransa Nasional	3
Militar no Forsa Seguransa sira	4
Polísia Nasional Timor-Leste	4
FALINTIL-FDTL	6
Lisaun sira husi krize saúde públiku Covid-19	7
Rekomendasaun	8
Bibliografia	9

Introdusaun

Covid-19 sai lisaun importante ba Timor-Leste - iha ne'ebé desde detekta kazu pozitivu ida (1) iha fulan Marsu 2020 Timor-Leste hola kedas medida nesesariu hasoru pandemia global ne'e. Iha tempu hanesan Timor-Leste infrenta hela impase política (estrutura Governu la kompletu, la iha Orsamentu Jeral Estadu, no governasaun ida la funsiona ho normal). Ho hanoin ida katak Estadu de-Emerjensia (EE) maka meiu legal ne'ebé fó kbiit ba Governu halo asaun política no seguransa hodi proteje vida sidadaun sira nian husi ameasa ne'e. Iha ne'e mosu luta kolektiva ida, Governu husu Prezidente Republika deklarara Estadu de-Emerjensia liu husi votu autorizasaun Parlamentu Nasional nian. Aplikasaun EE ne'ebé hala'o tuir Konstituisaun RDTL¹ no Lei Nú 3/2008, 22 Fevereiro (Rejime Estadu Sítu no Estadu Emerjensia).

Ho medida sira ne'ebé temi liu daudauk ne'e, to'o ohin Timor-Leste seidauk rejista kazu fatal ruma husi kazu Covid-19. Husi prespetiva seguransa nasional – hodi atua ameasa no risku sira ne'ebé Nasaun hasoru tau iha atuaasaun integradu liu husi Sistema Integradu Seguransa Nasionál (SISN), ne'ebé hala'o tuir lala'ok Lei Seguransa Nasional 2010 nian. Iha ne'ebé Sentru Integradu Jestaun Krise (SIJK) funsiona hanesan Sala Situasaun hodi jere krize ne'e iha Primeiru-Ministru nia Komandu.

Iha âmbito ne'e, relatóriu ida ne'e sei relata kona-bá papel sira husi setor seguransa nian nomos lisaun sira husi krize ne'e hodi mellora governasaun setor seguransa nian.

Metodolojia

Relatóriu ida ne'e halo análise no relata kona-bá lisaun husi Timor-Leste hasoru pandemia global ho estadu emerjensia ne'ebé aplika nu'udar medida preventiva, partikular deskreve lisaun sira iha prespetiva defeza no seguransa iha ambitu SISN nian. Nune'e dados ka informasaun sira ne'ebé uza ba relatóriu ida ne'e mai husi dokumentu ofisial, media, no rezultadu husi monitorizasaun FM nia. Prosesu ikus husi ne'e, liu husi metodu ne'ebé adopta maka *Security Sector Discussion* (SSD) ne'ebé involve peskizadór sira husi FM hodi diskute no análise ba materia relevante sira no hamosu rekomendasaun sira.

Sistema Integradu Seguransa Nasional

Tuir Lei Nú. 2/2020 Lei Seguransa Nasional – seguransa nasional iha karakter nasional, integradu, global no permanente, iha natureza interministerial no halo parte meiu tomak maka Estadu iha hodi hasoru ameasa ka risku oin-oin ba ninia elementu esensial sira. Atu halo komprimentu ba objetivu seguransa nasional, Estadu buka promove desenvolvimentu no atuaasaun integradu liu husi SISN². Iha prinsipiu sira SISN, atividade husi entidade sira ne'ebé forma SISN sai hanesan plurisektoral, multidisiplinar no

¹ Tuir artigu 25 Konstitusaun Repúblika Demokrátika Timor-Leste (2002), estadu de-sítu ka estadu de-emerjensia bele deklarara "bainhira iha forsa estranjeira nia agresaun efektivu ka iminente, perturbasaun maka'as ka ameasa atu iha perturbasaun maka'as ba orden konstitusional demokrátika ka kalamidade pública.

² Lei Nú. 2/2010, 21 Abril. Lei Seguransa Nasional, Artigu 3.

interministerial, no iha ne'eba hola parte orgaun no ema kolektiva tomak husi Estadu nian, hodi halo komprimentu ba objetivu permenente sira seguransa nasional no uza rekursu sira ho eficiente.

Atu hatan ba ameasa no risku sira ba seguransa nasional sei tau atuasaun integrada ida husi entidade sira forma SISN. F-FDTL, PNTL, Autoridade Prontesaun Sivil e Bombeiros, Servisu Nasional Intelejensia, Migrasaun, Alfandega, Autoridade Nasional Maritima, Kuarentina, Konsellu Seguransa Distrital/Munisipal, Autoridade Aeronetika, sira ne'e hotu fó privilejiu ba komplementaridade no hakle'an kolaborasaun husi entidade sira ne'ebé maka forma SISN, iha aspetu operacional, treinu no lojistika, hodi bele hadia didiak rekursu sira no halo kumprimentu ba misaun sira ho eficiencia.³

Iha âmbito ne'e, SIJK funsiona nu'udar orgaun espesializadu atu fo asesoria no konsulta ba koordinasaun teknika no operacional kna'ar sira husi entidade sira maka forma SISN. Nune'e kompetensia SIJK maka halo kordenasaun ba kna'ar integradu ema nian, instalasaun sira no meu seluk, atu hatan ba situasaun todan, risku ka ameasa nomos forma sira halo koordinasaun interministerial, hodi garante seguransa interna no atu hatan ba dezastre natural ka kalamidade pública.⁴

Militar no forsa seguransa sira

1. Polisia Nasional Timor-Leste (PNTL)

PNTL nia kna'ar iha estadu emerjensia maka nu'udar ajente implementador no kontrolu ba sidadaun sira atu kumpre regara ne'ebé aplika, no mós apoiu instituisaun sira seluk partikular saude hodi garante medida sira ba prevensaun saúde nian iha ospital no sentru saúde sira, fatin karantina no izolamentu, no mós fatin públiku sira. Husi ida ne'e, PNTL nia esforsu maka'as liu aproximasaun polisiamentu komunitariu ne'ebé vizibel tebes, hanesan sosializa regra sira estadu emerjensia no enkoraja sidadaun sira hala'o tuir medida sira prevensaun ba Covid-19. Ba aplikasaun ne'e, PNTL estabese 'sentru informasaun polisia' ne'ebé lokaliza iha Centro Formasaun Polisia (CPP) hodi fahe informasaun ba comunidade sira iha dalan públiku no mós ba to'o iha estudante sira.⁵

Aktividade PNTL iha situasaun alerta ba estadu emerjensia hodi garante situasaun seguransa rai laran no sensebiliza comunidade ba prevensaun Covid-19, halo patrolamentu la'o ain iha tempu kalan no mos loron. Nune'e mos resposta sira iha âmbito atuasaun polisial nian no tatika polisiamentu komunitariu ne'ebé PNTL aplika susesu no dada ema tomak nia apoiu. Maske nune'e iha mós kritika balu hasoru pesoal PNTL ne'ebé hala'o kna'ar ezejuta regra estadu emejensia iha terenu.⁶

³ Ibid, LSN, artigu 17 no 18.

⁴ Ibid, LSN, artigu 29 no 32

⁵Notisia TVE, (04, Juñu, 2020). Disponivel iha ne'e; <https://www.youtube.com/watch?v=6gHn5A-Mo00&feature=share&fbclid=IwAR0n1fpiNifV7SE17Z3R8HRmgvrjvsIrhqbPeGCT05THbzV3Jlu8M3W5agA>

⁶ Komunikadu Imprensa FM (15, Maiu, 2020). Observasaun Durante Ezekusaun Estadu de-Emerjensia Luta Hasoru Covid-19 iha Âmbito Seguransa Nasional

Kauza husi kritika hasoru PNTL ba intepretasaun lalos ba aplikasaun medida ne'ebé sala no atuasaun ne'ebé la nesesariu no la professional. Hanesan kazu membru PNTL tuku hasoru sidadaun iha karantina tanba la obdese atu halo tuir instrusaun husi membru PNTL iha fatin karantina. Husi kazu na'e PDHJ lamenta no hato'o katak iha abuzu ba direktus umanus tanba direitu integridade fizika ne'e lahetan limitasaun durante estadu emerjensia⁷. Enkuantu PDHJ mós relata katak liu husi relatoriu monitorizasaun rejistu kazu 230 durante estadu emrjensia. Iha kazu hirak ne'e maka kona-bá violasaun direitus umanus no Governasaun ladiak, husi ne'e kazu hamutuk (52) ne'ebé komete husi PNTL (38), F-FDTL (9) no Ministeriu Edukasaun (5) ne'ebé hasoru sidadaun no estudante.⁸

Durante aplikasaun ba regra EE rigor tebes halo comunidade sira la sente livre, hanesan mós semana primeiru no segundu iha faze primeiru implementa estadu emerjensia. PNTL bandu ema fen laen labele tula malu ho rasaun distansiamentu fiziku. Ida ne'e meiu diak ne'ebé konsege kontribui ba prevensaun covid-19 maibe sorin seluk lakonsege aplika ba regra ne'ebé balansu, tan husik ema politiku sira nafatin halibur malu iha reuniaun ho grupo boot hodi kontra distamentu fiziku/social ne'ebé PNTL la halo intervensaun.

Aleinde ne'e FM nota mós PNTL halo asaun kariesidade liu husi fó nesedidade baziku ba comunidade kbit la'ek sira⁹, iha tempu hanesan insituitasaun infrenta difikuldade finaserial ba kombustivel no nesedidade apoiu servisu operasaun polisial nia.

Iha sorin seluk kona-ba vizibilidade durante estadu emerjensia hanesan mudansa estra-ordianaria ne'ebé PNTL fornese kona-bá aproximasaun polisimentu komunitariu. Hanesan vizibilidade iha dalan protokulu, iha bairu sira, iha fatin kuarentena, fatin izolamentu, Hospital nasional no sentru saude sira, ho rekursu ne'ebé natón PNTL utiliza ho eficiente hodi hatan ba sitausaun ne'e. Hanesan exemplu, iha Dili PNTL vizibiliza nia membru efetivu hamutuk 257 ba iha postu vijilansia ne'ebé establese no koloka efetivu (82) iha fatin kuarentena (9) iha Dili¹⁰.

Hanesan mós iha munispiu sira koloka postu operasaun no halo servisu vijilansia ba prevensaun Covid-19 nia, no PNTL- UPF no UPM nia servisu maka'as iha fronteira hodi kontrolu movimentu ilegal sira. Ezemplu ida, tuir dadus husi Sentru Integradu Jestaun Krize, hahu iha 08 Junu- 15 Juñu, ema hamutuk 25 mak hakat klandestinamente iha rai ketan. Husi total ne'e nain 10 iha teritoriu RAEOA nian- Citrana ema nain (4), Oesilo (6), Nain (14) iha Munispiu Bobonaro- Memo ho Tunubibi ema nain (8), Lolotoe (2), Batugade (4), no iha Munispiu Covalima (1). Nune'e mós iha area tasi nian iha 12 Junu 2020, sidadaun Vietnam nain (11)-mane nain (8) feton (3) hamutuk ho Indoneziu nain (2), halo vijajen hahu liron 10 liu ba husi Sidade Kendari-Provinsia Sulawesi Tenggara-Indonezia, tama ho sira nia Ró iha illa Jaco-Lautem, tamba sira prezisa ajuda konvustivel hodi

⁷Komunikadu Imprensa PDHJ (10, Abril, 2020). Disponivel iha ne'e: https://web.facebook.com/search/top/?q=PDHJ&epa=SEARCH_BOX

⁸Tatoli (30 Juñu 2020). PDHJ Rejista kazu 230 Kona-ba Violasaun Direktus Umanus no Governasaun la diak. Disponivel iha ne'e: <http://www.tatoli.tl/2020/06/30/pdhj-rejista-kazu-230-kona-ba-violasaun-direitu-umanu-no-governasaun-ladiak/>

⁹News PNTL, (18, Maiu, 2020). Disponivel iha ne'e; <https://www.pntl.tl/sentru-formasaun-polisia-halo-kariesidade-ba-kbiit-laek-durante-estadu-emerjensia/>

¹⁰Tatoli (02, Maiu, 2020). PNTL ho F-FDTL monta Postu Operasaun Hat Iha Dili. Disponivel iha ne'e: <http://www.tatoli.tl/2020/05/02/pntl-ho-f-ftdl-monta-postu-operasaun-hat-iha-dili/>

kontinua sira nia viajen tasi laran. Entretantu sira nia Ró rasik mos avaria/aat tamba sira labele fila ba tasi autoridade munispiu Lautem, hamutuk ho 'Unidade Resposta Rapida'-Sala de Sitausaun CIGC, transfere ema na'in 13 mai halo kuarentena iha Dili. Hafoin halo ezame laboratoriu sira na'in 13 nia rezultadu negativu hotu. Autoridade kompetente sira akompania hela sira nia prosesu husi prespetiva migrasaun nian.¹¹

FM louva ofisiais, sarjentu no ajente sira PNTL nia servisu maka'as. Liu-liu PNTL nian aproximasaun polisiamentu komunitariu ne'ebé vizibel tebes hanesan sosializa regra sira estadu de-emerjensia no enkoraja sidadaun sira hala'o tuir medida sira prevensaun ba Covid-19, patrullamentu iha fronteira terrestre, munisipiu sira, dalan protokollu, iha bairu sira, iha fatin kuarentena, fatin izolamentu, ospital nasional no munisipiu sira, akompania comunidade afetadu sira ne'ebé transporta husi fatin ida ba fatin seluk. Nune'e mos resposta sira iha âmbito atuasaun polisial nian. Tatika polisiamentu komunitariu ne'ebé PNTL aplika susesu tebes no dada ema tomak nia apoiu maske iha mos kritika balun hasoru pesoal PNTL. PNTL hatudu ona mudansa extra-ordinariu durante iha luta hasoru Covid-19.

2. FALINTIL - Forsa Defeza Timor-Leste (F-FDTL)

Institusaun F-FDTL nia apoiu iha âmbito seguransa interna nian no reforsa kontrolu sira iha fronteira terrestre, hamutuk ho PNTL, forsa seguransa sira seluk, profesionais saúde sira no ajente sira seluk luta hasoru surtu Covid-19. Inklui kooperasaun servisu iha fronteira ho forsa seguransa Indonézia nian. Ida ne'e hatudu katak luta hasoru ameasa no risku sira ho forma ida luta integradu nia tuir SISN ne'ebé hatuur iha Lei Seguransa Nasional 2010.

Nune'e mós misaun ba seguransa interna nian ne'ebé hatudu husi F-FDTL liu husi Unidade Polisia Militar hamutuk ho PNTL estabelese postu operasaun haat iha Dili halo pasa revizta ka *auto stop* ba kareta sira ne'ebé halo movimentu husi foho tama kapital Dili. Postu provizoriu hat ne'e hari'i iha dalan tama ba kapital Dili mak hanesan iha Fatu-Ahi, Lahane, Manleu, no Tasi Tolu. *Auto Stop* ne'e ba kualker transporte públiku ne'ebé halo sirkulasaun tama-sai Dili, proibidu lori sasan kroat, no halo sosializasaun ba pasageirus sira atu kumpre regra EE no medida prevensaun Covid-19 ne'ebé Ministériu Saúde no OMS rekomenda.¹²

Esforsu seluk husi F-FDTL nian mak aumenta postu militar tolu iha fronteira hodi fó apoiu ba Unidade Patrulamentu Fronteira (UPF)-PNTL. Postu ida iha Cova, Alto Lebos, no Mota Masin, kompleta postu militar ne'ebé existe nanis iha Tilomar, Tunubibi no Batugade.¹³ Reforsa F-FDTL iha fronteira atu apoiu rekursu PNTL ne'ebé menus hodi satan Covid-19 ne'ebé lori husi ema hakat illegal.

¹¹ Rui Maria Araujo (15, Juñu, 2020). Atualizasaun relatoriu kazu Covid-19 husi Koordinadór Ligasaun Ofisial ba Forsa Tarefa. Disponivel video iha ne'e: <https://web.facebook.com/2289228521345667/videos/650957935493635/>

¹² Tatoli (02. Maiu, 2020). PNTL ho F-FDTL Monta Postu Operasaun Hat iha Dili. Disponivel iha ne'e: <http://www.tatoli.tl/2020/05/02/pntl-ho-f-ftdl-monta-postu-operasaun-haat-iha-dili/>

¹³ Tatoli (29, Abril, 2020). Komandu F-FDTL Aumenta tan Postu Militar Tolu iha Fronteira. Disponivel iha ne'e: <http://www.tatoli.tl/2020/04/29/komandu-f-ftdl-aumenta-tan-postu-militar-tolu-iha-fronteira/>

Kontrola fronteira ne'ebé luan ho rekursu ne'ebé limitadu sai hanesan dezafiu boot ba prevensaun Covid-19 ne'ebé tama-sai liu husi dalan ilegal. Difikuldade ne'e kauza husi fatór nesidade ekonomia, familia no no edukasaun. Exemplu iha Suai Fatumea, ema la'o do'ok kuaze distansia horas rua ou tolu atu ba sosa hahan iha vila, tamba laiha merkadu ne'ebé maka besik nune'e dudu komidade hodi kontra regra.

Lisaun sira husi krize saúde pública Covid-19

1. Fortalesementu Institucional

SIJK maka halo kordenasaun ba kna'ar integradu ema nian, instalasaun sira no meiu seluk, atu hatan ba situasaun todan risku ka ameasa nian. Kompetensia husi SIJK ida maka forma sira halo kordenasaun interministerial, hodi garante seguransa interna no atu hatan ba dezastre natural ka kalamidade pública sira; Nune'e, atu jere situasaun krize hanesan kalamidade pública, SIJK funsiona nu'udar Sala Situasaun iha kazu sira hanesan esepasaun konstitusional ne'ebé regula kona-bá Estadu de-sítu ka Estadu de-emerjensia¹⁴. Durante krize ne'e SIJK seidak funsiona ho Lei propriu ida hodi regula kona-bá ninia lalaok – ikus mai mosu dezentedementu balu husi responsavel Ministériu Saúde nian ho SIJK.

Hafoin liu tiha dezentedementu ne'e Governu finaliza dekretu lei ida kona-bá regulamentu ba SIJK durante estadu de-emerjensia. Maske Dekretu-Lei ne'e aprova ona maibe la ho konsulta ne'ebé kle'an ho entidade relevante sira. Portantu SIJK la funsiona deit iha tempu EE maibe funsiona mos iha situasaun sira normal.

2. Seguransa Umanu

Menus ba ekipamentu no fasilidade saúde, rekursu umanu, menus ba produsaun agrikola, hamlaha no nesidade esensial sira durante pandemia Covid-19. Nune'e mos impase política ne'ebé la'o besik ona tinan tolu fó konsekunsia boot ba vida sosial no ekonomiku. Iha tempu hanesan Timor-Leste la iha mos Orsamentu Jeral Estadu no ekonomia ne'ebé depende deit ba osan husi mina rai nian no iha krize ida ne'e Timor-Leste sofre liu tamba mina rai nia folin tun maka'as los iha merkadu mundial.

Nune'e lisaun importante ba Timor-Leste maka tenke investe ba setor produtivu sira hanesan setor saúde, edukasaun, agrikultura nomos setor sira seluk ne'ebé fó osan ba ita ho sustentavel. Maibe presiza mos estabilidade política hodi garante investimentu sira ne'e.

3. Política Seguransa Nasional

Mundu ohin loron, ameasa no risku sira kompleksu tebes, la'os deit ameasa konvensional sira maibe ameasa la'os konvensional mos. Iha ne'e ita presiza haree ho luan no kle'an, no tau atuasaun mos husi componente oin-oin ne'ebé hola parte iha sistema seguransa

¹⁴ Lei N.º 2/2010 de 21 de Abril. Lei Seguransa Nasional, Artigu 38

nasional nian. To'o ohin loron ita seidak iha Polítika Seguransa Nasional hodi trata asuntu sira ne'ebé temi liu daudauk ne'e. Iha âmbito ameasa no risku sira ba estabilidade nacional, ita la hatene ameasa no risku ba Timor-Leste ne'e saida no oinsa ninia atuaun husi komponente sira militar no la'os militar.

Tamba ne'e, presiza Polítika Seguransa Nasional hanesan médiku ida hodi fó diagnosa lolos ameasa no risku sira ba Timor-Leste. Nune'e ninia atuaun sira forma tuir atuaun sira ne'ebé hatuur ona iha Lei Seguransa Nasional 2010 iha kuadru SISN katak atuaun integradu no respeito ba idak-idak nia autonomia, komplementaridade no uza rekursu ho eficiente. Covid-19 hanesan lisaun importante ida hodi dudu Governu prepara no elabora Polítika Seguransa Nasional ba Timor-Leste – tuir Lei Seguransa Nasional 2010 nia dispozisaun.

Rekomendasaun

1. Rekomenda ba Governu kontinua hametin institusaun sira Estadu nian no kapasidade resposta sira iha servisu públiku nian. SIJK hanesan lisaun ida ne'ebé Timor-Leste tenke aprende oinsa hametin institusaun sira Estadu nian responde ba krize sira ne'ebé Nasaun hasoru.
2. Rekomenda ba VIII Governu Konstitusional no ba futuro - lisaun sira husi krize saúde pública Covid-19 no husi EE fó hatene mai ita katak Timor-Leste tenke investe ba setor produtivu sira, no tenke iha estabilidade política mos. Nune'e atu hatan ba dezafiu sira ne'ebé Nasaun hasoru, liu-liu ameasa no risku sira tenke ho Polítika Seguransa Nasional ida.



Bibliografia

Dekretu Governo Nú.03/2020, loron 28 fulan-Marsu

Fundasaun Mahein (13 Maiu 2020). Starvation and Covid-19. Disponivel iha ne'e: <https://www.fundasaunmahein.org/2020/05/13/starvation-and-covid-19/>

Komunidade Imprensa (27 Abril 2020). Prezidente Repúblika Promulga Estensauun Estadu Emerjensia atu Prevene no Kombate Covid-19. Disponivel iha ne'e; <https://presidenciarepublica.tl/2020/04/prezidente-republika-promulga-estensauun-estadu-emerjensia-atu-prevene-no-kombate-covid-19/>

Komunikadu Imprensa FM (15, Maiu, 2020). Observasaun Durante Ezekusaun Estadu de-Emerjensia Luta Hasoru Covid-19 iha Âmbitu Seguransa Nasional

Lei Nú. 2/2020, 21 de Abril, Lei Seguransa Nasional

News PNTL, (18 Maiu 2020). Sentru Formasaun Polisia Halo Kariidade ba Kbiit laek durante Estadu emerjensia. Disponivel iha ne'e; <https://www.pntl.tl/sentru-formasaun-polisia-halo-kariidade-ba-kbiit-laek-durante-estadu-emerjensia/>

New PNTL (27 Marsu 2020). Estadu Emerjensia Zero Toleransia Movimentu Ilegal iha Fronteira. Disponivel iha ne'e: <https://www.pntl.tl/estadu-emerjensia-zero-toleransia-movimentu-illegal-ih-fronteira/>

Prezidencia da República (27 Marsu, 2020). Menjazen husi Prezidente República ba Povu Timor-Leste kona-ba Estadu Emerjensia. Disponivel iha ne'e: <http://presidenciarepublica.tl/2020/03/mensajen-husi-prezidente-republika-ba-povu-timor-leste-kona-ba-estadu-emerjensia/>

Prezidencia da República (28 Abril 2020). Menjazen Francisco Guterres Lú Olo Kona-Ba Estensauun Estadu Emerjensia, (27 Abril 2020). <https://presidenciarepublica.tl/2020/04/mensajen-prezidente-republika-kona-ba-estensauun-estadu-emerjensia/>

Tatoli (30 Juñu 2020). PDHJ Rejista Kazu 230 Kona-ba Violasaun Diretus Umanu no Governasaun Iadial. Disponivel iha ne'e: <http://www.tatoli.tl/2020/06/30/pdhj-rejista-kazu-230-kona-ba-violasaun-direitu-umanu-no-governasaun-ladiak/>

Tatoli, (02 Maiu 2020). PNTL no F-FDTL Monta Postu Operasaun Haat iha Dili. Disponivel iha ne'e; <http://www.tatoli.tl/2020/05/02/pntl-ho-f-fdtl-monta-postu-operasaun-haat-ih-dili/>

Tatoli, (29 Abril 2020). Komandu F-FDTL Aumenta tan Postu Militar Tolu iha Fronteira. <http://www.tatoli.tl/2020/04/29/komandu-f-fdtl-aumenta-tan-postu-militar-tolu-ih-fronteira/>

Tempo Timor (13 Maiu 2020). Reforsa Seguransa Rai Ketak, Tama illegal husi Fronteira Tiru Tohar TIha. Displonivel iha ne'e; <https://tempotimor.com/seguransa-defesa/2499-reforsa-seguransa-rai-ketan-tama-illegal-husi-fronteira-tiru-tohar-tiha>

Tempo Timor (08 Juñu 2020). Sidadaun 27 Ilegalmente Tama Timor-Leste Inisiu Estadu Emerjensia datoluk. Disponivel iha ne'e; <https://tempotimor.com/seguransa-defesa/2672-sidadaun-27-illegalmente-tama-tl-ih-inisiu-ee-datoluk>